



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Avla ... Thesavrorvm Dei In Passione D. N. Iesv Christi
Effusorum ad Resvrrectionem Mvltorum**

Eyschen, Georg von

Coloniæ, 1655

§. 277. Facti sunt velut mortui. v. 4.

urn:nbn:de:hbz:466:1-45515

foucant, illuminent, vt viuam semper in claritate tua cum ijs siue in cœlis siue terris. Gaudeo autem me in illa esse Ecclesia quæ lucem & fulgorem habet posita super candelabrum, vel supra montem, quæ non est inuisibilis, ut Reformata, sed semper fulget vt sol in universo.

§. 276. *Præ timore autem eius exterriti sunt custodes. v. 4.*

Quare exterriti sunt custodes? ob fulgurantem scilicet faciem Angeli, ob albedinem vestium, ob viuentem in sepulchro visum, in quo mortuus custodiebatur, ob mirandam claritatem vbi plena esse debebat obscuritas. bene igitur præ timore exterriti sunt, & expergefatti custodes ob terræ motum insuper & petræ & sigilli refectionem mirificam, vt iam testes velint nolint esse debeant veritatis de resurrectione Iesu Christi, ipsi qui mortuum custodire non valuerunt.

Domine Iesu non ego te mortuum, sed viuum custodiam semper in corde meo per gratiam, Angeli candor illic illuceat, vt inimici custodes qui malitiose me circumstant, & vigilat vt me perdant, exterriti fugiant semper & fiant sicut mortui sine viribus vt hi milites.

§. 277. *Facti sunt velut mortui. v. 4.*

Nescientes scilicet quid dicerent præ stupore visis tot mirabilibus quod homo mortuus propria virtute viuus exurgeret, clausis & obsecatis portis, ipsis in excubijs existentibus, nec contradicere aut impedire valentibus, nec quidem loqui ob illum admirabilem triumphum victoriæ, & splendorem, tot millibus Angelorum cohortibus concomitantibus, sibi solum timentes ne vel ab ipso resurgente punirentur vel ab ipso præside de mala custodia.

Domine Iesu redemptor meus inter tua in me quotidiana miracula, & misericordias sum pro dolor etiam ego sæpe quasi mortuus, vnde mihi irascor de mea erga te magna ingratitude, peccatis quotidianis multis & grauibus, & quod præcepta tua tam parui faciam. Cum igitur vel mortuus sim, tu solus potes me resuscitare, da igitur gratiam vt ex hac hora ex morte animæ resurgam nunquam in ea moriturus, vt merear te resurgentem & gloriosum semel videre in cœlis, & æternum iubilante voce exaltare & glorificare in cœlis.

§. 278. *Respondens autem Angelus dixit mulieribus. v. 5.*

Dum vigiles quasi mortui iacerent præ confusione, vt nec officio militis amplius fungi possent, vel interrogare aduentantes mulieres de tessera vel symbolo, vel causa aduentus, vel arcere à sepulchro armis, vel Angelum interrogare qua potestate & audacia reuolueret lapidem ab ostio monumenti.